



SAOPĆENJE ZA JAVNOST

Nakon žalbe Tužilaštva Distrikta Određen pritvor Ristiću i Deniću

(Brčko, 6.2.2024. godine)

Nakon žalbe Tužilaštva Distrikta, Osnovni sud u Brčkom odredio je pritvor inspektorima Policije Distrikta I. Ristiću (49)* i S. Deniću (48)*, uhapšenim 17. januara u nastavku operativno-policijske akcije DAMA. Pošto je po žalbi ovog tužilaštva Apelacioni sud ukinuo odluku kojom je prvostepeni sud prvobitno odbio pritvoriti osumnjičene, Osnovni sud otklonio je propuste na koje je žalbom ukazalo Tužilaštvo, određivši im pritvor od jednog mjeseca. Pritvor Ristiću i Deniću, koji se sumnjiče za zloupotrebu položaja ili ovlaštenja i primanje dara i drugih oblika koristi, određen je usljed bojazni da bi uticajem na svjedoke mogli ometati krivični postupak.

Ristića i Denića sumnjiči se da su tokom 2022. i 2023. godine, znajući da se A. T. i Ristićeva kćerka I. R, koja je dan ranije uhapšena u okviru iste akcije, bave neovlaštenim prometom opojnih droga, iskoristili službeni položaj kako bi im pribavili korist. Sumnja se da su njih dvojica u više navrata zahtijevali i primili novac da ne preduzmu službene radnje otkrivanja i gonjenja osoba koje se bave neovlaštenim prometom opojnih droga, propisane Zakonom o krivičnom postupku Brčko distrikta BiH. Kako se navodi u tužilačkom prijedlogu za određivanje pritvora, oni su pribavljali korist I. R. i A. T. u vidu omogućavanja nesmetane prodaje opojnih droga, osiguravanja povoljnijeg položaja u krivičnim postupcima za I. R, ali i u vidu stvaranja ubjeđenja kod konzumenata i prodavača opojnih droga da ona ima zaštitu policijskih službenika i da može ostvariti efektivnu kontrolu nad njihovim postupcima.

Podsjetimo, protiv Ristićeve kćerke I. R. i većeg broja pripadnika organizirane grupe za promet opojnim drogama, duže vrijeme sprovedene su istražne aktivnosti, a 16. januara izvedena je operativna akcija DAMA, koja je rezultirala njihovim hapšenjima. Sumnja se da je upravo I. R. s ciljem sticanja finansijske koristi organizirala grupu za nabavku, prodaju, predaju, prijevoz, držanje i posredovanje u kupoprodaji više od dva kg marihuane, preko pet kg amfetamina i neutvrđene količine tableta MDMA Extasy. Nakon što je I. R. lišena slobode zbog sumnje da je počinila krivično djelo neovlaštene proizvodnje i stavljanja u promet opojnih droga (iz člana 232 Krivičnog zakona Brčko distrikta BiH), na prijedlog Tužilaštva određen joj je pritvor od jednog mjeseca. U međuvremenu, istražne aktivnosti proširene su i na I. Ristića, njenog oca, kao i na S. Denića, policijske službenike Policije Distrikta. Već 17. januara, uhapšeni su zbog sumnje da su počinili krivična djela zloupotrebe položaja ili ovlaštenja (iz člana 377 Krivičnog zakona) i primanja dara i drugih oblika koristi (iz člana 374 Krivičnog zakona). Usljed bojazni da bi mogli uticati na svjedoke, Tužilaštvo je i za njih odmah predložilo određivanje pritvora, što Osnovni sud nije prihvatio, određivši da se 19. januara, uz mjere zabrane sastajanja sa svjedocima, puste na slobodu. Cijeneći da se tako ne može osigurati uspješno vođenje krivičnog postupka, Tužilaštvo je na ovu sudsku odluku izjavilo žalbu Apelacionom sudu. Pošto je uvažio žalbu, ovaj sud ukinuo je odluku nižeg suda, naredivši mu otklanjanje propusta na koje je Tužilaštvo osnovano ukazivalo. Po ukidanju prvobitne odluke, Osnovni sud održao je novo ročište, nakon čega je obojici osumnjičenih inspektora odredio jednomjesečni pritvor. Njima će se trajanje ove mjere računati od 1. februara, a rješenje o određivanju pritvora potvrđeno im je i od strane Apelacionog suda Brčko distrikta BiH.

*Preduzimanje radnji krivičnog gonjenja prema određenoj osobi ne znači da je ta osoba zaista i odgovorna za počinjenje krivičnog djela. Prema principu presumpcije nevinosti, svako se smatra nevinim za krivično djelo dok se pravosnažnom presudom ne utvrdi njegova krivica.